


林一叟赬齋集



愧瘖集卷之十九

愧瘖集卷之二十

莆田二山野人林大輅稿

雜著

讀后峰黃先生獄中錄

后峰先生在部署日

疏六事觸忤時忌殆忘其身若贊若敘若詩皆
獄中語也先生下

詔獄三日大輅亦逮繫相視且久先生時則危
坐如有所思時則浩嘆如有所激時則濡墨握

管如有所言問之則掩楮曰禍且弗測吾語家
以後事云旣而獄杖越五日

廷杖先生奪職輿疾歸輅再逮繫數月謫夷陵
過家先生候予于涵江相語悉獄中語乃期登
古囊過九峰三宿雲莊而別嘉靖改元先生起
南大理丞以入賀見

天子疾卒于京一時縉紳罔弗悼痛嗚呼先生
處患難如閒居視生死猶旦暮欲惡分嚴綱常
任重古志士仁人其殆是與然先生百杖弗死
而死於柄用之初則予於天道益屢悲焉予撫
楚歸哭先生于祠于墓其孤耜孺出像卷拜而
觀之癯貌古心斗山如見直節剛風天壤俱窮
嗟嗟后峰其弗死矣俯仰十七載若一夢然迂
鄙林壑疇其惠我不覺涕泗之交集也

斗山欣仰詩集後跋

士以文需夫用遇若否人弗謀焉謂其力足以
揚側微介然爲德者惑也群試而受濟焉煦然
而德夫知者亦惑也大道公而已矣人之心公

斯感發乎其情庶乎其正與東廣稱多士弘治甲子歲中丞鳳山聶公以御史按茲土適監試事今稱得人者先焉公嘗言曰吾嚴夫度焉耳周夫防焉耳簡文恭事則有司存精而覈焉耳他罔敢知也其公不以私而示諸人者夫維時登名之士睽而思戴而宗亦不以私德公也適公入

覲而部院庶賢郡邑諸位仰公如泰山北斗會以道席薦以清觴競爲誦言諸體各備諸縉紳

將公美者嗣復歌之侈厥逢也實孚者衍美盛者傳論政師人於是乎在斯集其可誣哉昔公爲御史忤逆豎家食數載起廢長貳湖臬某判夷陵時備屬獨後聞湖之民爭者必於公質無敢欺者事之難義獨勤之群之疑者服公撫諸省某備戎從事見公黜浮崇朴剔蠹戢貪允可裕諸民如饑渴於飲食然頑獷始輯縻以威信未嘗疲一師費斗餉以消釁禍公之惠在民者深矣性貞介義命自信植奇以近譽援交以

嚮時公之所不能也而世之深知公者鮮矣諸君子所以仰公者抑又不在於斯與不在於斯與因識所知作後語云

雞峰贈別

亦山鄧子尹武緣將行別予於雞峰予悵然語之曰子用世者也東西南北弗能規也山人雲石僻鄉髮種種白矣志澹澹適矣談落落孤矣將遲子復來乎子於雞峰忘之耶亦山子曰吾奚忘諸雞峰顧地遠神馳簿領纏束將虞吏譴欲規君子之誨其奚能耶先生於武緣殆忘之矣予復與亦山劇論漢循吏數人而進之單父武城之業亦山曰吾其識之願先生朝夕吾稽也予乃摘錄漫語數篇于卷遺之題曰贈言記地也嗚呼古人重別也情則弗睽誼則弗譎言則弗澆予於鄧子睽也譎也澆也乎哉鄧子清才遠志於武緣乎何有退食之暇摘吾漫語其將予教哉

題畫篇

歲乙巳夏四月林子寢疾浹旬旣稍解乃移榻于堂之東隅客至則起坐與談款款數數然體力損頽敦復兒乃假澹峰黃子繪事一帙置几案間予厭囂納寂澄氣休體數數觀焉山高乎深乎烟雲晴暝其變無方乎水澗乎壑乎溪若聞其聲乎蒼然群木乎抱石翳曦其千層滋乎寒其栖而宅乎豁其遊而舟乎物象可攬結乎恍乎神遊乎餘疾頓解乎翼日客來視訝曰子倏乎顏之澤神之凝也子有奇醫矣予語之因客曰子得非泉石膏肓烟霞痼疾者乎子歸楚久矣猶待於繪事愈疾耶夫黃子通儒也繪成帙意到也神亦到焉其清也疇梃之其遠也疇探之其冲穆也疇像之洞野辭榮結廬人境澹峰壽溪還往弗豫圖中諸繪其實歷矣夫子非同志與猶待於繪事愈疾耶復兒語予曰翁會意處宜綴數言兒日供筆硯後乃隨興卒卒歌咏之弗覺盈帙

柯氏三子字說

林子自楚歸反舍烏山歷太平岡之雞足峰棲處焉迹則小隱隱無忘舊學也暇日間歌華黍豐田載芟良耜以舒素適友人柯松軒甫來言曰昔者稽序紀化五氣布百穀用登時及生長子次子三子則相繼生乃命之名曰實堅實好實粟著應也茲將冠需公竝字之林子作而異之曰命名意深矣父之於子聖之弗忝祖教之弗負性貽之弗離名予其欽哉乃進實堅字之曰穀完完成也函滋茂止淑而旨蓄載進實好字之曰穀克克和也爾色爾馨粹精孔鍾更進實粟字之曰穀美美嘉也毓植有穫純頤萬億甫曰是固華黍豐田載芟良耜之遺響與冀公終教之林子引而大之曰物也可以觀學矣聖訓云苗而不秀秀而不實鄒書云五穀不熟不如萑稗夫不實不熟蕪穢之田謂自棄也深耕易耨力田者事學者辟諸是故勵彝懋植樹學敏仁興興乎翼翼乎則旣完矣由是實中豐外盈彼溢此動容周旋儀則爲矩四體其有不克

乎由是利用心逸民物化醇明德惟馨百靈用
享以美利利天下矣是故完言成也不完而缺
疇其克之克言和也未滿而溢疇其美之美言
嘉也弗嘉而莠疇其葆之是故股肱不嗣惰農
自安則襲取炙人人賤之矣朽敗自列人惡之
矣糠粃混珍人棄之矣謂非農者之恥邪人之
恥大矣人而不學其恥甚於農也宗族誹焉鄉
黨嫉焉官師懲其咎辜之又奚遠視農之恥何
如邪三子其戒之乎世有敷蓄人也疆畝陳修
率惟茲攸受攸畢奚患其不完不和不美乎三
子其進於是已乎甫再拜曰旨哉請以貽之歲
月考之以觀其維耦如壟乎否

黃氏五子字訓

嘉靖歲戊戌冬仲黃子慰山廷揚甫過予言曰
走冢子逢恩將冠字之禮也願聞先生教予不
敏然逢恩則外子也乃唯役黃子復瞿然曰諸
子次逢盛次逢隆次逢賁又次逢升鱗列嶷然
冠有期欲比其兄教予曰教豫哉亦惟役乃進

五子命之曰遇主謂恩晝日三接晉錫康侯惟君子自昭明德爲邦之楨夫寡孚者濫襲華者覆負彝者殘如恩何必彥而恩斯恩矣字爾逢恩曰幼彥際時謂隆天休滋至時曰弗戡樂只君子福祿多降弱植則墮成忽微則兆釁覬倖則悔終如隆何必戡而隆斯隆矣字爾逢隆曰幼戡履盛之道利用謙夫才美者嫉之困功高者辜之鵠譽弘者誹之藪克有終盛耶君子以退謙明禮則尊者益光卑者亦莫能逾字爾逢盛曰幼謙處賁之道利用晦夫備文鮮仁飾觀易剝謏譽罔衷賁其有永耶君子以用晦而明惟玄惟默守道之極其闇然而日章與字爾逢賁曰幼晦升者進也高之下遐之邇弗可踰焉者也睽而跂之餒而張之匱而盈之雖欲升惡乎升君子深造之以道成章後達利于不息之貞字爾逢升曰幼漸能漸則允升而吉能晦則賁明而亨能謙則盛而民服能戡則其隆亦孔之固能彥則恩錫滋蕃其弗可窮矣是故君父

者道之綱也家邦者事之紀也德業者身之會也性習者學之樞也利義者覺之機也先難後獲勿助勿忘孔孟氏之教也故君子之於天下也與其弗恩也罔弗彥也與其弗盛也罔弗謙也與其弗隆也罔弗戡也與其弗賁也罔弗晦也與其弗升也罔弗漸也蒙以養正其聖功與脩身俟命其廣教與予嘗怪著族子幼也穎暨長也澆暨於老也棄服美甘食祗滋蠹爾黃世澤未艾紹闡亢宗其焉諉諸予爲逢恩若弟懼諸子厥亦知所自懼也哉於是廷揚甫再拜誨言林子乃識而貽之

祭文

祭樂亭翁謝先生文

嘉靖壬寅正月十有二日癸巳樂亭翁謝先生卒于正寢通家姪林某同翁之孫舉人明勗視浴視歛釐事矣四月三日翁季子炯南京戶部疏終養歸至武林聞翁訃星言奔至某弔戶部相嚮而哭越十有五日謹奠以牲醴庶羞

乃言曰翁攻舉子業旣弗售則棄之從事列署持文墨議論恪辟警澆志弗挫也需次家食挾舊業客于天下抄誦規程文字學者售而式之繹如也暨乃官盱江倉儲清焉乃郴巡宰禁戢肅焉郴界虔粵諸省洞寇連絡惟時勦征翁勞苦辛瘁感時倦遊遂謝事以禮去翁無利于官年未耆也斗粟銖金愛或博命漏盡冥行時之習皆然矣翁非超邁勇決能無滯于得失間耶戶部文章行義部使者器之藩臬譽之郡邑大夫日章之十年志養翁桑梓優游與先子中丞及鄉之耆舊日觴爲歡戶部首鄉薦書教貴溪有遺澤令黃陂桐城有遺愛清秩錫恩君子願之輿人歆之翁於是八十四齡矣方孺人多翁二碁鷺服翟章有輝者儀抑非希濶事耶嗚呼翁之食報於天者厚矣某髫孺與戶部偕志業異姓兄弟也翁視予猶子某撫楚歸侍杖屨七閱歲先子棄養翁月三四弔予慰予則數數旣數月翁末疾寡出某往視之翁曰吾息弗緝心

弗強吾其觀化哉嗚呼翁其前知已夫東山之
麓有萎者芳大老云亡疇弗盡傷曷以招之白
雲之旁曷以將之浮丘之鄉

奠 敕封太孺人吳壽母黃氏文

嗚呼太孺人其長逝已耶某也小子與伯子海
州守姻婭交遊三十餘禩通家誼道休戚相念
予之哭太孺人其同諸他人已耶粵記歲戊戌
太孺人遘疾伯子禱于神夕得夢焉太孺人飲
吾母太淑人于舍坐以齒母賓也右時較數以
骰子孺人先得數十有八吾母得十有四旁標
曰原十有八旣而伯子語予夢曰二母偕壽哉
栩栩歷歷澄吾神矣皤皤睦睦示予徵矣二母
未齡其無疆哉某也拜手稽首謝之二母寒溫
動息予二人歲時相候問周間而心相寤無忘
之茲歲之春吾淑人棄養某巨痛徬徨有天曷
告越數旬太孺人復遘疾海州君悚然懼猶冀
得數多於夢也旣而亦棄養嗚呼吾二母氏之
死之生其果不相違耶某因述夢而謂伯子曰

夫數十其謂終也數八其謂得年也戊戌距乙巳非八齡與吾母少數四太孺人之生先四齡而卒也後四月準之皆八也夫秘莫天若奧莫命若不測莫化若乃若前知豫應然者則二母氏之賢之壽固造物之所獨繫哉太孺人生名族女而婉恭婦而靜約孝謹得舅姑歡其事封君也順志戡事封君無內憂慈而方成家教子信于其族傳其鄉八十壽言予小子序之矧伯子家食若干年志養色承孀然孺則恬貧植操人皆難之季子諸孫旦夕繞嬉太孺人於諸福庶乎備之復何有遺憾哉嗚呼月之望矣川之盈矣鶴化蟬蛻數之恒矣予哭太孺人則痛吾母世胡無百歲之人哉胡二母之弗少延耶嗚呼痛哉孺人屬纊伯子季子削杖予哭之涕泣然交也薄奠稽期某也有伏枕之疾閱三月矣乃今匍匐于靈之次卒卒哀詞冀靈來鑒庶敝載陳靈弗予鄙庶幾享之嗚呼痛哉

祭馬翠峰先生配孺人朱氏文

某嘗聞往哲緒言矣夫稱爲內子者範而彝敘相而誼秩懿而時貞茲謂賢厥覲鮮矣夫稱爲人母者愛弗方踰約勿度戾恪弗耄落茲謂賢厥覲亦鮮矣某之哭夫人其由衷乎而罔敢澤辭以耀乎孺人初相翠峰公公齡方壯粹文篤行戶外傳經之士皆鄉黨豪傑也孺人拮据將順公爲師爲友志崇業樹而助多矣公登進士偃蹇州縣凡十餘禩孺人儉以裕匱怡以導仁嚴以防僻公無闕內顧慮逆濠之變公以南曹管賦豫章被械于獄不食而死孺人摧肝膽廢寢食欲嗣以沒南浦西江公之魂洋洋乎若徃將之然公臣而忠也舍生取義也孺人爲公內子百祀而賢傳之伯子子爲氏幹蠱用譽殖厚施勤齋其源而昌其流蘭之芳桂之叢孺人含飴分甘日移晷焉蓋未艾時也仲子子莘登進士旣十年爲御史封事直諫奪職家食幾二紀矣孺人語之曰而直職也林莽憂時而心也君子積學以豫間居以兢業訟咎以需時老易及

也又語之曰吾抱孫多矣未抱而孫也而早達而久窮於物無盈也負氣而寡黨於世無瀆也嚮賢而抑已於福利無餐也天道且定抑予衰矣豫章之淚猶懸也故年雖踰稀病及人扶而於子莘氏家政猶綱維焉約臧獲縮需費處疏戚罔弗宜人皆稱孺人曰賢母也有是母則有是子抑弗永有辭耶嗚呼綸縉之寵福履之盛鍾鳴鼎食華屋綺裳世之人所稀有而孺人兼之然非孺人樂也孺人相翠峰爲忠教子爲以育子莘以直彝倫誼道吾黨所稀八十五壽生死哀榮若太孺人者其復有遺憾耶某與子莘同年進者意氣莫逆出若處同焉哭太孺人猶哭吾母也荒鄙之章蘋藻之獻鄙人有思涕泗曷從嗚呼哀哉

祭朱南岡方伯文

嗚呼南岡公竟爾收聲林莽耶公負璀璨之才蔚瑚璉之譽登進士而拜給舍扶植善類砥柱頽流危言正色贊國是而張之當

武廟時慷慨有力氣肅佞僻如公者鮮矣都諫立朝毅然群喙之囂與二三論禮寵臣爭是非可否卒求於正

天子英明皆知瑣闥有直臣儒生知抗節未嘗不優容而與進也叅政浙藩固將大任也而公積忤叢忌亦孤立矣備倭之罰貴陽之謫公其能免耶數年遭迤乃轄大邦論世者以志行道溥冀公也然當國者嬖嫉必發持銓衡者又其黨也患失曲承疏追佞罰勒公歸里抑又能避耶彼落井下石彎弓面射者心固然也伺隙爭竒其可以已乎天機人事今視于古消長同也孰謂公能增秩終寵以老耶高三峰中丞曾語予曰南岡其完名哉公在林莽隱然海內望二紀翛然萬鍾奚加若祝堯年若忻周道聞時事若驚悵時賢若失課耕寓釣種藥談醫鄉有典刑吾黨有赤幟其卒也人哀之仰之皆曰南岡其完名哉某無似辱翁教翁之三郎則予婿也予楚歸二十年公城里過從泉石共命觴味倘

佯壺嶠蘭陵隨所至而休焉予之哭公其顛天之弗延老成人耶其憫世之無緣福耶其陸陸陳人恍惘遺音耶則亦再慟焉已爾野人之芹靈也鑿諸嗚呼哀哉

祭三麓吳州守先生文

先生雅諳醫理稍弗自豫輒延醫議証療藥淹旬日報効間對予言曰疾知謹調護則無他虞數數自喜二十載家食矣茲月之初疾作先生自視易易予輩視之亦易易隔四五旦聞者報曰相公疾弗可療矣予輩相告走視之先生睛且凝舌且蹇氣且逆上欲作問答且瞶予輩直夕視于榻至昧爽先生長別逝矣則視浴視歛視蓋棺傷哉生也哀哉爲慟三晝夜是奠也聊我私也絮酒隻雞同也嗚呼痛哉先生弱冠作舉子文字卽邁儕侶質清姿朗秩秩論議人知之皆色避而心企之登鄉錄三試南宮弗遇乃告授金壇文學淑後生崇正師古矯輕警惰模範道望籍籍然諸當道大器之薦之乃遷邑宰

于全椒未數月政平訟理標則靜謐古賢淳懿
粵惟良吏全椒方之其庶矣乎美在輿言澤在
庶姓旌在憲臣而忌在鄉貴任侍從先生以補
風憲取選而毀日增矣乃遷守海州先生不鄙
夷不卻退舉廢補偏易陋爲文郡喜其操而恭
下安其簡而惠衛諸武弁服其弗詭弗激翼而
教者覆露多也無何報罷歸歲乙未也內外士
論惜之嗚呼先生其艱於涉世哉夫學可以取
進士乃弗能才可以循要秩乃弗能寧海論定
可以廣志業乃又不能彼造物者玄默昭煥祐
善親仁於先生靳耶抑約而毅似也而或招嫌
介而任似也而或取嫉秉道疾邪似也而或納
侮古君子則然矣矧先生生叔世其於市利之
交翻覆之釁又奚疑焉莫之爲而爲者天也自
信者命也富貴利達有道者浮雲晞露譬之則
又奚憾焉先生歸且二十年矣瘠田散屋皆先
人遺者食指多餘糧外貸間於僻巷作小屋數
間習靜隨則鬻之獨于交游誼道古處白社諸

老詩咏賡酬通家有恤悉心相濟口不言貧迹
則避囂先生之自立其異諸人遠矣七十而終
豈曰弗壽遺德清脩豈曰弗賢胤也繩武詩書
可述蘭玉茁芳諸孫占禎天於先生其謂無意
於君子可乎某輩哭先生者爲鄉邦哭爲友朋
哭爲同進兄弟哭先生之靈固在左右也庶幾
於一奠而監我私焉嗚呼哀哉

祭陳三宜先生文

嗚呼介脩翁不可作矣翁方着孺矩度卽與俗
羣兒異古崖公教授瑞安愛之而幼教甚嚴公
病亟謂徐孺人曰瀾兒吾得之晚恨不終吾教
直觀其無幼態無謾言可以占其遠矣旣屬纊
翁哀毀如成人瑞守李公瑞庠諸寮莫不撫而
哀之翁自稱孤事孺人膝下餘廿年恭謹將順
讀書守度非母命不出戶庭古崖公在淺土日
思襄之孺人曰費奚所供翁曰業寧鬻不可緩
也孺人從之遂鬻田以襄葬事公遺詩盈篋珍
藏無一遺選其尤者梓之方伯翠渠周公宮保

見素林公少司馬山齋鄭公皆序之紀之古崖
公諱日哭盡哀家廟歲序奠獻如之世祖雪巢
公墓丘迷失百有餘禩公稽誌銘諸書旁尋以
獲凡諸先塋未封者封之未樹者樹之奠則宿
治草棘躬執箕掃奠畢達觀山畛語諸子姓曰
子孫到墓林須自斬艾閔歷庶無隱慮考文稽
古至老不倦世系族塚家乘更詳焉郡守馮檢
齋公嘗曰鄉有君子吾治之光以賓禮之及檢
齋爲閩方伯造翁廬下訪問如初傳比泉吾郡
節推三年貳守二年翁至其家編譜牒又二年
未嘗于以私家蕭然環堵也嗚呼難矣今之時
何時也叔世矣頽俗矣好學善道浴德去垢無
愧于身心者有斯人耶某家食二紀於詩於禮
翁予較也事予商也肺腑予示也病卧二日子
問之猶張目言曰子其視予後事哉古人誼道
之交蓋如是夫予之哭之慟抑無從耶嗚呼翁
不可作矣吾之思翁隨事興嗟感時出涕望七
之年猶有知已之助耶夫孝不遺親信不忘友

貧不易操貞不絕俗迂不衡時詩可以誦禮可
以式言可以玩容可以瞻浮山之裔古崖令子
銘之介修君子允之予於翁有澤詞耶生芻一
束奠于几前玄玄冥冥其鑒享哉

祭卧雲陳先生文

維嘉靖戊戌日纏胃維月軌黑陸乃卧雲翁歸
神太素辰也風淒兮吹帷雲黯兮蒙路膏晁兮
掩軒香沉兮閉戶嗚呼哀哉惟翁祖父奕世載
休世父康懿元勳殊猷爲時名卿爲鄉前修翁
有家緒意紹方表探古墳籍意會冥摛乃薄時
榮巾烏夷猶營慮弗躁履囂知柔儉而能展某
野某疇撫化而嬉某水某丘翁有令子 清時
珪璋起家民部聲實孔揚一封典殊錫承德煌
煌鷺袍桑梓有奕其光賓朋詩社蘭幟萃槩意
翁遐祉百齡其長胡爲一疾與化徜徉嗚呼時
命難齊浮生易憂雖有耄期終鮮遐休矧惟艾
耆亦云孔脩翁自穉齒之藏業暨七十之春秋
要諸古人之所稀固叔季之寡儔何諸福之駢

臻矧昌胤之名流得之若隆享之弗落非造化者所獨私也耶某等姻黨之情世交之誼蠲茲季春九日一奠用伸翁靈不昧庶幾來歆

奠南京戶部主事北山謝先生文

吁嗟北山可以死耶彭年一瞬殤子爲遲夢耶真耶元化爾司君方髫髻厥有穎姿萬言日誦孤燈敝帷齎鹽苦抱淵海襟期粵未弱冠璜琚厥辭如璞在石器之者誰如金在鑛弗躍亦遺年暨不惑賢書受知疇弗企子溟渤騰螭希子

寔遠鳳集于池君也貧仕薊溪載馳文章之範

行誼之資薦剡屢及志業日滋楚邑凋瘵獨曰

黃陂鳴琴宓子車兩隨施桐城易地三事稱宜

焚獨釜爨間閭飽嬉君子之澤驥騁中達司徒

南屬司銓掄竒權商弗擾人言罔私 龍章煌

煌王言如絲二親垂白鷺服翟倚乃歌陟岵乃

致甘脂梁公墓老萊子嬉兒丘園果賁風木餘

悲玄堂陰晚廣孝在茲耄矣老母樂養舍飴鄉

邦耆舊東山紫芝奚嬰一疾藥也罔持蓋棺事

定肺腑奚疑嗚呼北山竟止于斯豪傑稀遇親
朋易離高山流水悠悠我思牲不掩豆酒不盈
卮諸菓集只笑言怡怡辨香芬只神動靈旗嗚
呼哀哉

祭東山逸老雪厓方翁文

嗚呼雪厓翁厭棄人世忽忽焉已而西湖之里
后塘之逵比屋巨宗齋齋鱗次翁卒疇弗慨然
以嘻耶吾儕與翁髫髻之交文辭之勵場屋歲
月之觀桑梓過從之樂興言思之疇弗咨嗟而

揮涕耶翁於書日誦數千言記性視儕輩獨敏
思如湧泉文字弗易稿於舉子業可折枝拔雋
也翁於涉世和色異語詭險鋒械耻而不爲善
譎哄然滿座喜清言聽者灑灑以豫翁雅情易
及耶翁晚弗售謝庠籍隨例冠帶人爲惜之耆
稀之齡夜焚香閱古書作細字錄舊稿暨交游
詩嗜吟咏對客揮毫凡賡和必十數首乃止屬
續先十日對予言曰吾平生漫語多晚知嚮門
路而力弗逮矣吾將盡錄所作與知我者商而

改之錄之歸至三宜陳子家午粥作寒菊詩二
而病作而卧榻弗起矣嗚呼哀哉方簪纓閎閱
著姓菑先也翁爲族祖主族之祀歲時俎豆蠲
潔禮度嚴恭族子姓始若異言旣服承而敬之
敦睦者誼卑崇者分翁蓋棺論定未可議也翁
遺業薄而子秉衷幹蠱承意秉誠食力自營無
忝翁儒素也諸孫幼而疑異學也日競天之爲
翁食報者庶其在茲乎嗚呼白髮青藜相望數
舍騷壇觴社相失萬雲登翁之堂瞻翁之顏冥
冥寂寂吾獨悵夫東山嗚呼哀哉

誌銘

明光祿大夫太子太保工部尚書贈少保
謚康懿小泉林公神道碑

公姓林氏諱廷楫字利瞻別號小泉其先五代
時自光州固始入閩世爲閩邑開化里林浦人
曾祖諱觀祖諱元美號守菴永樂辛丑進士官
歷撫州知府俱以公父文安公暨公累贈太子
太保吏工二部尚書考諱瀚號泉山成化丙戌

進士改庶吉士歷翰苑春官南京吏兵二部尚書贈太子太保謚文安行載 皇朝名臣錄曾祖母蔡氏祖母鄭氏母菴東里黃氏封孺人俱以文安公貴贈夫人以公貴加贈一品夫人公以成化壬辰五月二十日生于長安官舍性資穎粹五歲屬對能驚座人十二擄詞作竒語書過目輒成誦十六喪母哀毀踰禮弘治乙卯以春秋領鄉薦己未會試魁天下士 廷試進士二甲第二人明年庚申授兵部武庫司主事督放京衛官軍冬衣條範周密大司馬端肅馬公亟稱善薦調職方查錄戎冊于南京轉員外郎陞武庫郎中忠宣劉公襄毅許公相繼爲大司馬皆賢公如端肅 孝廟銳意治理倚任忠宣公又爲忠宣所倚任以京城鋪甲閭閻踐更豪右影射驤騰四衛勇士冒食官庾私役內豎皆委公查正稽減清革人皆稱便正德戊辰同考會試所舉如劉君天和江君曉胡君纘宗皆名士薦調職方郎中諳練邊務地利將才靡不周

知每警報至手削案稿洞中機宜及逆瑾竊柄
曹元爲司馬善瑾部事卒意更張公執正不苟
徇吏部尚書張綵亦附瑾陽收正人以掩其私
先諭意於公欲改爲御史公力辭尋陞蘇州知
府年勞已不當典郡實銜而抑之蘇東南劇郡
財賦甲天下且當孔道公戴星視事剔蠹裁冗
鋤強振弱汲汲風化之務間接賓客無怠容未
期民和頌起庚午辛未七邑水災民力用詘時
瑾虐熾人莫敢言公抗言民窮苦狀乞盡蠲糧
稅并停織造內臣罷額外之征請潁墅鈔銀以
克賑濟疏入戶部難之公再疏暨移書當路始
定災傷十七餘俟豐年帶徵報至田里歡聲如
雷各邑歲輸止閔實易牒弗羨與餘吳有鉅姦
錢元祿者瑾私黨也瑾以爲囑公至以計擒之
伏法而死吳民大悅公校士鑑精拔其雋者皆
成大器平心直辭信於宦族恭慤以禮僚友屬
吏之賢而文者急商政理或歌咏相上下鄧令
某誣逮公直之而巡察卒是之雪朱慶寃獄不

遠嫌人誦焉少傅守溪王公稱其厥膏不屯厥
守不洿不振不譁吳民其孚蓋實語也擢雲南
叅政去之日民攀送遮道摹寫圖像以繫思云
公至不鄙夷其民躬歷荒邑景東諸郡糧積連
公令布帛馬牛皆雜輸以給武職俸均便焉土
官爭襲多仇殺公徐以一言斷之卽解癸酉鄉
試提調取士梓文勞勩爲多甲戌捧表入賀
萬壽公以泉山公老禮成踈乞終養 武廟許
暫回省抵家復上疏曰臣父衰病日侵聞臣將
行輒增憂歎臣若勉強就道倘以念臣之故憂
病不虞則臣身蹈不孝將焉用之奉 旨林瀚
歷事累朝名節無玷今旣年高有疾林廷楫暫
且在家侍養仍着本處有司時加存問蓋異寵
也時伯子炫以禮部主事謁告歸省三世一堂
鄉里以爲榮文安公薨哀毀如喪母合窆慟哭
痰壅幾殆壬午至莆展祭外祖澹軒公墓或勸
遊鯉湖竟不往家食無復仕志巡按屢薦或勸
駕公力辭謝會江西右叅政命下乃之官巡撫

盛公遇以殊禮屬脩十三郡志嚴正詳覈有良
史風薦陞湖廣右轄尋轉左明出納崇寬大軍
儲藩祿處給裕如也嘉靖丙戌入覲銓曹考
治行爲天下竝丁亥陞都察院右副都御史巡
撫保定等府兼提督紫荆等關公蒞鎮卽疏革
抽分內臣清查驛傳汎濫議處軍民數事風稜
赫然未幾爲巨力者所中傷罷歸臺諫交章論
薦陞南京兵部右侍郎與司馬王公廷相寅恭
協政首議裁抑中貴貢獻鮮船蹤聞著爲令

馬快船甲累及戎伍乃立畫一法歲減六百艘
餉省七萬石南京錦衣衛官由傳及戚晚非汗
馬功者疏乞罷免降殺入爲工部左侍郎遂掌
部事因尋見修上四事曰省營建以節財用處
織造以供賞賚計工料以省冒破專官守以司
出納蒙詔優納秋九月上御凝翠殿召
公見上出秋日書懷詩親灑宸翰命和進
覽賜珍饌督理內外工程如城垣石窩倉場
啓祥宮清馥殿東西兩所諸處工作無不當

帝心 上幸太學公侍坐彝倫堂賜茶聽講初
工曹堂署燬于火公至樽節財力鼎新之侍

上視地南城齋宮改建 皇史宬 上自撰記

列公之名歲承金幣之錫又 賜御製詩文書

籍及時鮮諸品因各處災傷疏請取回採木燒

造官員內府歲用銅鐵器皿請立法五年十條

十年一造省民財數十萬兩遼左軍變 廷推

大臣往勘僉曰侍郎林廷楫有定難才可使乃

以兼僉都御史領敕以行疏四事曰請發 旨

意榜文以安人心催督撫臣赴任以定地方選

擇司府官員以備委用會同巡按勘處以便事

情 上皆允之又移書巡按曾君銑密授方畧

竟擒首惡亂是用寧還朝受金幣之賚陸工部

尚書時 上營建 九廟 七陵壽壽宮 行

宮 慈寧 慈慶二宮 奉先 崇先 養心

文華諸殿公綜理其事每酌量工程之緩急商

度財用之所宜如借內帑開納例借兵部柴薪

馬價通惠河扣省脚銀及有所停罷 上悉允

之以故上當 聖心而歛不及民丙申 上謁
天壽山舉 宣宗百二十年之曠典駕出倉卒
公分能授事凡道路橋梁行幄器用不二三日
輒治六扈從往返若不知其勞特恩賜麒麟通
袖紗羅衣二襲刀銀瓢鸞帶諸物 上自擇吉
壤于陽翠嶺及周視 諸陵明堂香殿公皆獲
侍 賜御食內醞 上時紀述有七言律公恭
和以進 上覽稱善旣竣工加陞太子太保賜
銀綺加官辭弗允丁酉春 上耕籍田選充九
卿行九推禮公感遇殫忠至忘寢食裁抑私請
而忤者衆矣嘗兩陳休致及承 命之 康陵
啓 莊肅皇后堂祔夜親督視風襲左手足治
乃愈丁酉六月公懇疏乞休 上念勤勞允奏
給月廩輿夫陞辭 詔馳驛 賜路費寶鏹三
千戊戌 慈壽宮成 上賚銀幣于家巳亥春
册立 皇太子正位東宮公啓稱賀有表具悉
忠愛朕心嘉悅之諭庚子秋子炫以禮部精膳
郎中起用公曰吾老矣世臣圖報屬汝汝其勉

之辛丑七月二十九日公方對客忽風痰作八月三日申時終于正寢享年七十計至京師炫時爲精膳郎中禮部奏曰學有家傳業濟世美始則孝養於親終則勤事於國宅司空協成郊廟之規晉官保蚤上止足之義據法應得祭葬贈謚工部題奏亦有歷別中外蔚有才名砥行始終似無異議之語 上悼惜輟朝諭祭者九工部具本遣進士造塋域 贈秩少保賜謚康懿嗚呼公之恩寵始終無間矣公天性至孝以黃夫人不逮養有終身之戚敦厚母黨老而益切昆仲九人友愛無間先業讓弗受祠墓歲祀必躬必虔購義田以贍族梓譜牒以明系遇親舊宗朋有恩禮急困持危必曲爲之所事于非意亦善諭之同鄉許給事天錫同寮黃主事昭皆忤逆瑾觸禍公獨周旋翼助同僚王正郎宗率啓壙見水爲易葬之故友燕人徐璘貧且死公經營後事咸罔闕公世臣大老撝謙讓夷弗哀聲稱擔當大力莫能移之自信介豫防

緝釁萌有餘猷焉其和也童卒可親其辯也更
僕莫竟所思志不移所行夜必紀故敷政酌物
鮮有失者稽實積徵有永辭焉詩文粹清尤工
駢驪體有小泉稿奏議錄稿數十卷傳于家配
鳳池鄭氏郎中克和之女累封一品夫人婉惠
貞肅婉德於公子男二伯卽炫南京通政使司
叅議仲煬承蔭雲南曲靖知府女二長適閩清
庠生鄭瀾次適光祿署正黃梓孫世璧閩庠生
娶司成襲公用卿女世在聘節推方公邦望女
孫女二長適蘄州博士劉鵠翔炫出次適郡庠
生陳九德煬出其伯兄庭桂成化庚子貢士蚤
卒煬爲後弟庭楷指揮僉事庭杓慶遠知府庭
樟廣東都司經歷庭榆潮州府推官庭粉上虞
丞庭枝正德己卯貢士庭機嘉靖乙未進士歷
翰苑司成今爲南京太常卿一門衣冠之盛海
內鮮矣炫以嘉靖癸卯十二月二日葬公于本
里樟林山之原枕丁而趾癸公自擇地也大輅
族小子爾知公且深先時見于公夢敢辭銘役

耶乃銘曰

川嶽炳靈誕公于京秀發于祥維邦之楨源流
世學德器聿成春風時雨桂秀蘭馨掄魁春官
簡才本兵二三司馬國之典刑爰資翼勵庶政
用平皇猷旣宣邊陲不寧逆豎竊柄匪渝我貞
三吳出刺六事是程民豈魚鼈我涕縱橫蠲租
有䟽流惠孤莞湏省新命夙駕南征赫赫泉山
海內耆英綸音存問終養爲榮保釐三楚先哲
風聲矜恤平反覆露含弘賢者撫世禮樂干城
南兵載陟參贊風清憲古崇孝惟

天子明僉曰其來汝亞冬卿利用大作于經于
營遼左不靖廷薦公行授算折首定亂扶傾

帝曰司空百度爾誠翼翼

九廟皇皇

七陵高天厚地武周是京王食薦錫睿語載賡
麟章示寵止足戒盈星沈相里計軫

皇情卹典優至節惠易石世臣濟美光侈簪纓
樟林之原紫琳華旌百靈日護三芝歲生穹碑

蠢蠢功德之銘

愧瘖集卷之二十一

誌銘

莆田二山野人林大輅稿

節妣趙孺人泊逸士壽九府君墓碑紀畧
吾七世妣趙孺人年二十吾祖祿十六府君夭
逝遺孤壽九府君方六月孺人携依外家父母
欲奪志屢諷之孺人矢之曰林祚微幸有遺孤
天也撫孤吾志爾縱無孤弗林婦耶勤績絰自
給匱乏壽九府君甫六歲見外氏家歲時謁先

祠謂妣曰趙氏有先祠何林無也即求歸拜祠
輒流涕年八歲日夜語妣圖歸妣感之與歸聯
桂故居居已毀乃買數椽以居尋奪於勢家祖
年且長乃卜烏石之麓后塘者居焉建祠遷先
世墳用悅妣志縣催稅里胥強妣至官祖適外
歸途遇妣哭曰婦在毋何出耶遂將母歸跪請
杖因責翁氏曰吾母少節弗闕戶弗覲親今覲
官耶吾罪重若爲婦忍遺母挫苦耶立遣出之
改娶宋妣祖率之志養以孝稱嗚呼吾家爲唐

邵州刺史蘊公後至是替落甚非趙孺人之節
之慈與吾祖之孝之賢則亦殆矣祖傳男三長
諱熊公登進士爲名御史次羔公勲公俱有隱
德今族且蕃矣詩書嗣休代有聞人皆孺人與
祖貽之也孺人初葬常泰里東園山永樂庚子
嫡孫熊公改葬夏戴山隆壽寺前壽九府君祔
焉嗣曾孫教授贈御史智玄孫贈都御史光衢
學正仲瞻知縣道克相沿修緝今玄孫監察御
史季瓊六世孫封都御史易夫慨念先德乃率

子姓伐石樹碑命大輅紀于碑陰爲吾子孫者其尚念之哉毋俾吾妣吾祖之澤微哉

明翠筠王處士配吳孺人合葬誌銘

君諱時字維正別號翠筠出晉兵部侍郎祐之
後先世有從南渡某居長興晏子鄉成化甲辰
裂諸縣縣孝豐晏子鄉隸安吉始爲安吉人曾
大父五靈大父佑有隱德父珪徙家甲子山積
貲雄一邑抗聲于吳越間君篤於倫紀獨鍾父
母氏愛兄杲發弊胥蠹于分守胥賄貴人屬以
誣坐杲懼欲逸君負直入逮遭百杖弗屈胥服
之曰世間安有兄弟乃爾乃輸罪兄賜蚤卒君
毋事嫂子撫姪杲以松頭埧田五十畝預公需
庶第皆疑爲所私君與仲與叔言曰昔童而孤
幸我三人并父遺尚在盍易之則出田并遺再
以闡分君得闡知昔意屬悉以讓之鄰黃琮居
在通衢堪輿家言衝腋弗利君捐地爲衢黃琮
酬直却之性好施予恥慮殖齋齋姻人張乏助
之粟二百餘斛廣德州人乞糴于梅谿道爲饑

者奪君卹之衛之以歸正德丙寅安吉改爲州
九江廖維修紀肇爲守治嚴有撫拾奏守下御
史案之時閹瑾專柄人爲守危君愀然曰誣上
行私亂民也乃言于守願以身效居錢塘歲餘
守獄朝夕視守安事于外若家人然所至明守
心迹弗避忌守事直猶罰米三百石君揚于衆
曰父母廉吏也胡辨罰盍各量力助之不終朝
人輸米數贏焉吳孺人懿嘉善相父琬福建連
城縣縣丞卒且貧爲之襄事養母氏終其身嘗
言曰吾以父母累夫子義也夫子更煦焉吾安
之君好客每家食姻戚列席如織孺人自治具
務君喜君身兄難舅氏咎始難者則慰之曰死
生命也赴難情也時非辜何禍之悸君卒家駸
落孺人貶食節縮百心補葺子南金廩生方弱
冠檢糧籍語之曰而父困輸運逋負隱匿籍稽
焉盍明之訟人訟於人覈籍罔欺逋負隱匿官
乃清之金之辛勤紹志其孺人教哉君卒于正
德己卯年五十有五孺人卒于嘉靖辛卯年六

十有六子二長卽南金由選貢授興化府儒學訓導娶鳳陽府儒學教授沈君鉦女次銑側出娶莫鑑女女二長適寶慶府經歷莫如德次適莫瑚皆孺人出女孫三墓在富嘉墩之原金之教吾郡也謙約慎雅協士譽一日持先狀謁予曰先人卒二紀矣潛德莫揚不肖奚道罪惟君子之言可信後也敢以銘請嗚呼銘固有待耶銘曰曷弗恤躬恫而愛隆煦茲先神義植而終嗟彼顛蒙粵昭民恭富嘉之原雙玉載溫維以永年玄石潛言瞻者止軒有馨斯孫

明逸士黃君素齋暨配陳孺人合葬誌銘

君諱宣字德敷始祖江夏族也世居江夏父遠商于粵之蕃禺與母杜生二子伯也君仲也宗父歿蕃禺遂籍焉故蕃禺始祖則君父也父歿君尚稚杜鞠之比長事杜生死葬祭皆以禮仲夭撫其女奩而嫁之有一友人舉家罹疫僵屍交股蟲出人無殯者君毅然獨任旣入室羸者奄奄作聲曰荷公厚恩某有資財若干在某所

爲我出而殯之君爲完殯親舊有籍其家之玩器謝君君弗受貪者盜疫家貨疫患蔓十餘舍君舍獨寧嘗舟行遇盜驚墮水幾沒盜環刃撻之中有一盜獨蔽以身得弗死人皆曰陰德厚報哉少孤不攻舉子業晚好讀書每聞聖賢格言輒佩服之邸報有廷臣論劾國家事讀輒動色語其子持衡曰勢利啖軋誑橫傾奪人可以無恥耶兒或世用其是戒哉又曰貧乏吾分也身負命也哀欲亂性以娛溫飽非吾冀也遇事籌思或至不寐旣處分果中度晚結屋于先公塋旁至則號泣不忍去雅好山水喜談農笑語移日供具無繼弗恤也又嘗語其子曰吾于老厭湛俗願汝曹得償書債使吾爲北山老農足矣歲丁酉持衡領鄉書戊戌弗第君以病卽世矣識者罔不盡傷陳孺人戶侯將軍長女也歲二十五歸于君慈仁勤儉事姑得歡心處妯娌恭順罔有間言病劇君永訣之曰汝到我家三十禩矣無忝儷美未受兒一日養我再偶無負

汝邪迺不復續配可以稽孺人內相之賢矣君
生于成化壬寅某日卒于嘉靖戊戌某日享年
五十有七孺人生于成化己亥某日卒于嘉靖
壬辰某日享年五十有四子持節持衡持鑑持
鑑蚤卒先是孺人葬于欖坑之原至是君窆焉
持衡教諭吾莆甫五月以賢師儒擢

縣令

尹滿考以循良徵擢江西南昌府同知宦業民
庸柄用未艾君與孺人膺

贈錫誥其朝伊夕

哉持衡在莆徵銘于某至是乃銘焉敦宿諾也

發潛光也章孝慈也無敢侈言已爾銘曰

焯乎其昌而衷祗將秩乎其祥而應孔臧絜璞
爲璋絜蘭有芳胤也哲良邦家用光賁于泉堂
玄言龍章達人弗亡欖原之陽

明中順大夫廣西太平府知府長所鄭公

墓誌銘

公諱公奇字士望唐刺史肇之後宋咸淳進士
禮部架閣校勘甫則八世祖也大父順菴公重
光鄉貢士教胙城平陽餘干三庠父脩齋公典

歲貢鎮江司訓公少穎異順菴公竒之因命名
長嗜學善屬文領鄉薦順菴公年逾八十及見
之順菴公篤行勤教昨城平陽始有科目遺澤
於餘干尤多迨歸翛然寒峻貞慤誼道前修所
鮮公承祖父之志登甲戌進士除新建知縣寧
庶人虐熾巧伺人辜釁諸司多枉章媚之公持
廉秉正爲巡撫孫公燧所與庶人嘗縱湖寇攻
劫商舶寇恠巨窩無畏公密計擒其魁吳十三
閱念四等餘黨戢遁邑民有鉅萬貲者庶人屢
奪之逃之湖湘復殖產庶人謂公曰某人移亡
牧者之責可給批代汝獲之公詰得亡者狀復
之曰前牧弗能庇殆覆其家故弗寧茲土奚獲
爲庶人歲出穀萬緡挾糧戶借用至徵輸時倍
償歲徵例負公乃諭之曰朝廷錢糧與寧府私
債孰急乃督之先完糧庶人嘗發羸馬十餘匹
責居民買民訴之公公爲白諸庶人曰藩封厚
祿奚利於數馬庶人沮卒歸其馬庶人壇祭多
索鹿民倍入直公不與直以一鹿應剛齷積忤

凡三載庶人逆節萌令人於外執公繫之乃殺
巡撫孫公副使許公達乃繫諸司于儀衛司叛
旌下安慶諸司捧檄者說降者城守者司賦計
者各出于繫公在繫恨不得面折逆賊以死提
督王公守仁分數郡兵尾賊戰而獲之自以兵
入城首自繫出公視篆犒卒捕餘黨嗣查逆產
清別無隱王公益器之巡撫鄭公岳䟽功罪諸
司殊死者流戍者編氓者罷敘者公獨奉旨云
新建縣知縣鄭公竒旣平生居官守法素不爲
宸濠所喜降二級留用遂左遷西安丞五邑缺
令輒代理凡可裕民殫心力以濟西安有兄弟
九人爲盜貽鄉害開化妖巫言禍福趨者如市
公促捕各寘諸法三載遷沛縣知縣沛苦河患
夫後病良公移文議豁巡撫唐公龍乃調停其
役數月陞鳳陽府同知修齋公與毋林先後卒
公憂居讀禮凡七閱年復補廬州府數月陞廣
西太平府知府時
天子欲征安南太平邇疆屯兵聚餉盤錯棼結

難乎守者公練恪耐事副是選人謂公二紀宣
勤邊守豈任耶公言曰太平非絕域其何如馬
伏波兵事孔棘敢謂難乎乃不挈家以行屬之
長多土酋諸謁禮例入賄公諭戒不可且剗其
宿弊數十事足爲永規夷性頑獷素安慢政公
嚴以華紀束以吏貫如笠突豕如樊饑鷲郡譁
然若弗堪者公曰民慮始難久當自靖糧若芻
至則野積百姓飲汲於江公曰野積易耗汲江
必有中壽流者則築倉百舍鑿井數十所田州
狼兵駐劄民困市易公諭禁率二日一交粥乃
無擾民欣欣然相告曰胡爹後一人而已前守
尚書胡公世寧也與公俱德於太平云公經理
兵食精繁淹疾至戊戌十一月長至日稽首
聖節謁先師退告祖禰受季第拜無病容屆暮
稱眩暈卒卒大漸越三鼓卒是日也

天子以明堂禮成推恩外服官公得贈司訓公
如已秩贈母林配林封配曾俱恭人嗚呼異哉
公天性孝友謙夷誠懇修齋公每日兒苦節宦

貧吾安志養鎮江餘祿悉讓二弟二弟婚嫁累
輒往需官所公則分俸匱則預支薪馬曾恭人
贊之無間言鳳陽守曹仲禮氏嘗語予曰鄭士
聖廉士哉吾曷其弟又曷其親曹負節慎與其
固重公哉公在太平隱然邊鄙重卒撫按巡守
拊膺於邑惜賢憫窮厚賻而津送之家食指繁
磽田舊屋異未官時幾何二十年郡縣大吏家
瘠瘠乃爾耶嗟嗟畏所蓋棺事定可以見古人
矣公生成化辛丑僅年五十有八子男三雲鳳
郡庠生曾出娶處士黃潛女雲鶴邑庠生側室
劉出娶監生方重紹女雲鷗尚幼女三長議憲
副林君茂竹子次議少司空吳公大田子次幼
俱側室雍出孫男應鑄雲鳳稽顙泣言曰不肖
孤往侍先子至則卒二日矣欲一旦殞躬以見
先子荒陬扶襯哀哀視息尊賢可塘之山大父
化丘在焉茲巳亥臘月壬午以先子祔壙右是
藏也先子自力焉丈人與先子有涑水公蜀公
之誼敢以銘請某少受經于修齋公以兄事畏

所甲戌同錄仕籍畏所有心事則予告遠則予書知畏所惟予銘予責也銘曰

士也楸拘未祿而臞宦而走趨日馳千駒孰蹇而迂孰戇而儒裒囊篋肱裼鼓岐衢碩人夷居麗江化樞前胡大夫譽協璠璣冥冥者途章章者模墓也非諛我銘鬱紆

封奉直大夫朴翁鄭先生墓誌銘

莆仕族比秩其親鮮秩而壽聲美侈諸人滋鮮儔方后論鄉有公是哉 封大夫抱朴鄭公卒

越歲其孤臨江郡守成昭君泣哭以狀謁銘某知公者乃爲之辭公諱灼字孟輝陳隋間太府卿露偕二弟講學南山時稱南湖三先生大理評事臯折居前埭五傳爲宋郎中禧公於郎中爲十四世孫於評事爲十九世距太府卿凡二十二世大父道登永樂丁酉鄉薦爲河南考城令父楫妣蔡氏公少孤長治舉子業不售例辟汀椽宜人王氏事蔡遺業薄殫力色養弘治庚申公省祭歸王氏卒繼娶許氏業猶落公處之

適日惟課子讀書正德丁卯成昭領鄉薦辛未
登進士授江西廣信府鉛山縣知縣公喜曰可
畢吾志矣癸酉公選授湖廣德安府孝感縣尉
道鉛語成昭曰樹而治行尉非吾父志也孝感
俗謾喜爭公愛利爲惠民戴之躬脩董孝子墓
以勵風化時縣令翁素以習宦器公事多詢議
而行雲夢令缺知府馬籥委攝邑質者至咸直
以理不閱月訟遂簡是歲十二月偶爲馬傷嘆
曰針斗之祿胡爲身累乃移疾謝事翁令曰尉

於民宜未暮月可聽去耶懇留之公示之無留
意翠庭中丞公時副臬事行部到邑嘉公志達
請巡按曹御史御史以公能尉恬退自喜不欲
奪乃允之公歸翁令率僚暨文學官邑大夫偕
鄉之老者餞于郊皆嘆曰尉比無令歸知幾適
志尉其賢哉尉其賢哉正德丁丑成昭入爲刑
部主事以疏忤錢寧中傷謫外者二年嘉靖改
元復錄南曹開讀覃恩封公奉直大夫南京
刑部湖廣司署郎中事員外郎王氏許氏贈

封俱宜人公優游林壑不營殖產於郡縣寡私
謁時與封大夫洪懌齋陳卧雲史簡齊予翁招
唐族人見晚梅谷爲東山逸老會鄉族質疑事
論裁無隱飲人以和嘉靖己丑邁疾失雙明人
訝焉未幾醫者視一針卽復人皆喜曰茲仁厚
之報固神庇也公日與同志者嘯傲成昭歸自
臨江奉顏志無弗懌甲午冬公疾命治後事語
諸孤曰吾當還造化兒輩其慎業履以無墜前

逝十一月十八日也距生天順壬午享年

七十有三男三長懋德娶陳氏 封宜人次懋

勤懋和俱郡庠生勳娶宋氏與臨江守皆王宜
人出和許宜人出娶陳氏繼娶方氏孫男五吉
鍾英鍾傑紹開喜先王宜人葬興教里中山之
陽茲以某月某日奉公柩合葬銘曰

蔚維才矣胡歛其施調宦之榮奚性之宜鄉有
述矣爰飾其規謂時之適乃退之私章則大夫
養則牧守食報者豐油乎何有彼美中山玄宅
斯壽銘而貞之以詔厥後

封承德郎南京戶部主事龍坡陳公墓誌

銘

公諱天祿字允適曾大父明善大夫文昌教諭
珪并贈資政大夫南京兵部尚書世父康懿公
俊忠亮沉毅在

憲廟朝歷諸署佐長稱名德公卿先焉父儀以
明經辟肇慶新興訓導弗就寄懷象外鄉謂長
百母黃氏生母李氏公生魁梧鬚垂至臍少治
書業之自號卧雲居士喜吟咏喜布

政周公瑛書嘗曰詩縱弗唐若叫號鉅釘押韻
成言抑詩耶晉人書神逸難學近號善書多戀
能匱力書其然耶故詩每有警句書體格遒勁
通周善治生劑量豐約化縮而贏先植滋裕焉
子應之登進士爲戶部主事封公如其官嘗
就養南都縉紳過從則談名理或相賡酬宦家
老所鮮應之轉郎中以戇執忤部長被陷歸公
語之曰而知乎射影之毒弗虞者罹下石之釁
寡黨者懼士師三黜誼耶人耶數耶見歸篋蕭

然則啞然笑曰貧乏消息到吾矣時課孫輩見
所有苦學奇文則又笑曰第觀神理而當充吾
宗性好山水與家君中丞翁御史林公伯麟史
公濱祥郎中鄭公灼主事黃公清林公謚結東
山榮逸會郡大夫禮爲价賓公辭大夫懇致之
曰不干官府以私孰與執事价賓之位惟執事
是將惟鄉人有翼公乃赴修族牒建小宗祠文
昌康懿公逸稿博求手錄至髹椅細物亦識自
宦谿來友人鄭磐貧死則助之葬敦彝植義天

性然矣公生於成化己丑五月十一日年七十
卒於嘉靖戊戌二月二十八日配林氏封安人
子男二長卽應之幼名如麟娶提學楊公琅孫
女封安人次昂之幼名如鴻娶吳氏女二長適
族祖通判侃子遠次適周應奎孫男五長所有
郡庠生所益早世所蘊所存所在公卜墳于九
華中麓坐乾向巽作亭種樹歲三四至爲樂已
亥十二月十日應之昂之奉公柩藏焉乃以縣
博鄭君鳳狀請銘某與郎中同筆硯同舉于鄉

公亦予愛銘曰

養之豐匪營而冲秩之貴匪侈而氣年之稀匪
周而歸九華者木玄宅者谷吁嗟卧雲神遊茲
麓

明青田縣儒學訓導致仕秋崖朱先生墓
誌銘

嘉靖庚子秋七月二十有六日秋崖朱先生卒
越十二月二十五日葬于東廂象山麓家子
文載以陳君咸郎中狀來拜而言曰先子未屬

纒語孤兄弟曰必林都憲銘吾墓嗚呼先生其
不可作矣按狀先生諱龍字舜臣後以字名改
字汝隣別號秋崖唐湖州觀察使仍之裔世居
南劍六世祖發元季以平寇功授亳州千戶始
遷莆西洲五世得明富而好施四世彥輝改居
東山下侍讀綱齋公述隱德詳祖元父啓攻舉
業教于鄉先生少穎異復得父教學益精堂試
輒先諸士時司馬陶公琰司空劉公丙爲閩臬
長貳暨諸寅幣致爲西賓先生探討淵邃奧旨

疑義多所開發三閱載坐一室口不言貧談不
及外事封畛疑然歲時歸省陶張宴于堂之後
所率群僚餞來則拜如餞禮庠士教于臬司茲
異格也陶改官徂浙爲父簡齋銘墓蓋視先生
爲國士先生自待亦以國士云蹇躓場屋坎壈
終其身數也如之何哉初授處州司訓再改青
田傳經者屢滿戶外徒之貧者時恤濟之方滿
考適毀

文廟塑像先生度勢不能爭意不悅溫時宰續
婚女自溫來括守某逾百里候跪舟次如津吏
狀先生竊嘆曰士氣之卑乃是邪未幾引疾歸
郡邑暨諸生留不可家食杜門耽古籍時有新
益舊交相過從則偶坐啜茗談之或蔬食共飽
而別庭滋蘭桂每花時移席獨對嘯咏終日達
官貴人來謁或招宴多以疾辭人語先生曰絕
遊有是哉先生曰夫交遊者將譽美以歡之耶
抑規誼以相益邪將任情以葆光邪抑含機以
候色邪將丈人以自儀邪抑忘老以折節邪今

之遊非吾能也郡守黃公一道重鄉飲酒禮肅
中丞翠庭公爲賓先生爲价始欣然赴之嗣郡
大夫肅賓亦不赴先生性澹氣剛嚴重簡默一
布袍三十年官時衣無錦麗水尹浦瑾青田尹
方伯時重之相待禮渥論事侃侃罔避忌有言
直戇風平生無聲伎之好非道之利視之若浼
嘗語某曰吾教臬司臬群公愛官處庠守黃西
壺愛使吾欲富無難數百金蒙垢負知其將能
哉吾其貧矣吾其貧矣先生門人多顯者如陶

郎中滋鄭太守公竒與予同年間談先生則曰
約而植介而誼直而弗許其古之道與某辭也
荒揚濟曷竟先生生於天順甲申十月二十一
日享年七十有七配孺人鄭繼李先卒子三長
文載邑庠生娶林子仁女次文英娶千戶張定
女次文繡娶指揮賈麟女女一適通判吳腆孫
煇孫二萬言萬祥孫女四曾孫一顯祖峰麓之
窳坐酉向卯合李孺人葬銘曰
相古熙熙善則相師玄風代述一譽百誹曷譽

而喜曷誹而疑志崇遇小厚抱涼施是謂先生
拓落而馳巖巖東石百仞瞻之彼美象峰松栢
羅之晝翔者雲夕輝者塵其惟永藏之

誥封太淑人顯妣許氏夫人壙誌

先妣許姓諱靖姐東廂後隆人也高祖遇生公
洪武進士御筆改名謙官行人曾祖庠公高郵
州學正祖琳公湖廣雲夢縣學訓導父原明公
冠帶壽官母東里黃氏監察御史深公之女行
人司司副乾亨公之姊黃生我妣姊若弟三人

黃卒妣教育於舅氏家將笄還許歸我中丞府
君我外祖挾府君商能積贏府君自商番禺值
疾五載乃歸盡失其資既歸凡所畫弗如意業
且落妣拮据瘁力麻泉織紡同我大妣方太淑
人一燈炯如夜分罔怠某亦攜書讀於其側歲
食穀約三閱月弗給餘布易之某幼能記誦稍
長學舉子業易了了爲鄉長者所許府君語人
曰非吾家世積善非吾蹇困艱辛不有此子也
我妣於夫意常憚言之朴之義方尤嚴每教之

日而父好心賜只性直人易誑耳而讀書常長
進其知世澤何某補弟子員娶婦黃氏亦能儉
勤蠶絲共積無慮衣食矣某間捐私敦誼妣曰
而分匪哉而之志則人所難也相慰藉行之正
德癸酉某登鄉薦甲戌進士授冬官主事丁丑
封我府君主事妣封太安人暨某上封事下
詔獄數月獄杖廷杖謫夷陵判官過家妣涕
言曰而有幾兄弟耶而荷祖宗之庇得生還也
遠謫殊恩可弗念與嘉靖改元某荷恩起落

數歲歷藩臬長貳妣語人曰大輅厚祿且久吾
未見肥田廣宅也其抑知守官乎吾聞守官者
雖公卿積祿亦有量也吾敢外顧邪癸巳陞都
察院右副都御史巡撫湖廣地方封府君如
其官妣封太淑人我父母之德之教造物者
真若私矣甲午某以地方災歛引咎投劾忤
旨賜罷膝下之歡甘脆之養我府君七年我妣
十有一年疾也藥送死也大事必恭罔敢有悔
焉已耳妣貞約謙抑一布裳二十餘年珠翟錦

綺非慶事節辰弗服寡言笑非臥疾未嘗一日
不束髮斂襟待僕御勞則念匱則惠與卑幼語
不以我稱與親之貴者語不能作煦煦炎熱以
取喜過街數步令侍人前後瞻疾趨而往高大
父侍御公而下講日必先期掃室焚香蘋藻牲
羞自視而薦於大父中丞公大母淑人諱必哭
盡哀疾且數月精神凝定無一言戾素臨卒猶
下牀潔身而逝婦道母儀六十年間稱賢懿可
爲吾家典則多矣嗚呼巨痛裂肝浮息待盡某

罪狀可殫紀邪妣生於成化乙酉正月二十二
日卯時卒於嘉靖乙巳正月二十五日未時享
年八十有一男二長卽大輅妻黃淑人永豐里
義官黃公汝珪女次大輪側室馬氏出妣愛之
勝如已生聘黃石陳叅議孫一鳳女孫男三長
敦復以任子恩任南京光祿寺大官署署正娶
布政使周公宣女封安人次敦履郡庠生小
婦黃氏出娶提學副使顧公陽和女次敦良小
婦王氏出孫女二一適知州黃公大中子廷揚

子逢恩次議布政使朱公鳴陽子曾孫男肇曾
議知州吳公音孫女墓在雞足峰下東數武坐
壬向丙府君卜而管者凡四窀右府君妣左次
右次左大輅與婦黃藏焉昊天罔極百世焉依
嗚呼痛哉抑我考妣於塋祭例有卹典某以罪
譴疏請未能犬馬之身烏鳥之情天地雨露之
澤萬一有待焉爾百拜號泣謹誌于壙麗牲有
碑信後有銘當請諸立言君子云

明光祿寺少卿致仕進階朝列大夫慎脩

姚公偕余宜人墓誌銘

公諱永字思永別號慎脩系出唐奉禮郎天明
始遷福清之韶谿公八世祖宋提刑宗之十世
祖朝請郎興析莆游洋相繼顯庸五傳至廷喜
始居暢山高祖均祥曾祖謙道俱不仕祖綿陵
教諭景考渠 贈太僕寺寺丞妣陳氏 贈安
人公生也晚幼質弱爲父母鍾愛少長肄訓義
方無所貸方卅凝然老成人鄉未軒黃公見而
竒之比長嗜學師鄭學諭應祚十餘年弘治正

德間莆士傳經績文浸浸委廓絢達而公造詣
邃華實備秩然可誦凡試多首選同輩亦豫遜
之樸貌訥辭英氣盡歛一時名士多相企慕正
德丁卯領鄉薦登戊辰進士第出宰德化簡惠
廉勤蕭然自樹崇學校均徭賦息獄訟振頽廢
庠宮城堞途梁館傳罔弗繕葺行部者交獎其
能間有以亢直忤者廉其隱轉復譽之三載擢
丞太僕連遭內外艱居苫致哀葬祭以禮服闋
猶結廬墓側弗忍去庚辰秋復補舊職時馬政
武皇南狩

舛弊乃勤自巡督值

今上入御太僕用馬多馬不告匱登

極例錫外復有金幣 特恩嘉考牧也隨奉

敕贈公考如其官妣及配 贈封皆安人嘉

靖癸未公仲子文炤復舉進士官刑曹郎父子

同朝莆百年來僅一再見而公惕于止足懇疏

乞休進光祿寺少卿致仕海內士大夫作褒恬

諸篇以贈比歸家食鄉飲僅一赴亦不輕至城

府竭力祠先祖豆式嚴調貧有穀助役有田掩
骼有塚惠卹旁流諸族咸嘉賴之奉叔愧軒猶
父完之樹封諸姪及姪女爲之婚嫁若干人追
思綿陵公奉遺像見公門人魯祭酒鐸涕泣言
遺事魯爲之述贊寺丞公不喜奕公終身不視
棋局柳籠風木愛護益勤遠祖野菴循陽暨提
刑公墳林界韶谿公修復之率諸族人鬻田以
祀脩景祥僧宇用守元祖塋篤涇陽之愛割租
以廣時祀厚相鄭學諭塋事事師母如師時致

餽問交遊誼好有空乏輒悉力以助如林尹世
明庠友吳韶音皆善視其孤戴編修大賓嗣絕
公爲立後且涖其葬里有七間大洋大溝公濟
諸橋倡義募衆先後脩圯凡費二三百金衆欲
豎石紀惠輒謝止河北館人誤焚行寓郡方繫
治公亟白釋之陳僉憲愛源子幼族富人潛移
浩後官逮方急公白于郡卒直其事仲君歷仕
部大夫郡伯藩臬貳長出則教以忠勤歸則趨
侍受訓兢畏如未仕時儼然萬石河東家法暢

山九華蜿蜒麓也公世居之旣歸三十年淨宇別院層軒精廬意適則作之梗南豫章奇英怪石歷歷萃勝公倘佯吟咏其間晚作逸老域于西山堂室臺池憑玄挹清芄蘭喬木環谿翳雲公旬月必一至或再至必信宿或幾宿取樂於無盡貽餘于裕後非人所能及也方伯忽念公心動自浙歸待未數月公寢疾不可作矣公生死榮哀昭明高朗固一時純嘏也余宜人出鎮前右族淑而惠服勞舅姑蠶織并曰惟謹處妯娌

皆有恩從宦江邑猶親自澣濯任饋公性嚴急濟以寬和庶生子女愛如已出晚患翳視而縱理彌勤君子以爲儉而慈惟德之齊篤生方伯爲時屏翰其信有自哉子男四長文燦郡庠生蚤卒娶鴻溝吳廷相女效貞不渝次文炤官澗江左方伯娶淇陽陳滌伯女封恭人次文燁娶鎮前余子廉女相繼先卒俱宜人其次文燁娶贈僉憲林大尹壻女側室高出女五長適吳炎次適林志成次適鄭力漁次適林晚成次許

黃逢榮孫男八長健郡庠生娶林景哲女次一
弼郡學生娶陳邦臣女次一璋郡庠生娶林方
伯應標女次一瑛聘林郡丞應采女次一琳聘
張憲副英女次一珂未聘次一瑞聘鄭郡伯富
女次一璐尚幼孫女五曾孫男七應祝應兆應
登應魁應節應春應祥曾孫女五公生成化甲
午九月二十六日卒於嘉靖癸丑二月初十日
享年八十初封奉政大夫續進朝列大夫余生
成化癸巳十月初一日卒於嘉靖丙午八月十

九日享年七十有四初封安人加封宜人墓在
澄渚西山之原趾丁酉癸公所手營者方伯卜
以是年正月朔日奉公柩與宜人合葬焉祔以
文燦及庶母高氏嗚呼此名山百世之藏也某
某後公入仕辱公教歸侍公杖屨二十年方伯
以大叅王君鳳靈行狀徵予銘墓予曰慎脩公
也而宦業而出處而棲遲令德考終有則有祉
無遺憾矣予非能言者擬狀銘之銘曰
暢山信美疇發其祥澄山淑秘疇堅其藏哲人

惺齋集 卷之三
穆穆令聞允揚絃歌惠愛機杼文章艾年勇退
千仞翱翔談農課圃丘壑之光鳳毛時棟世業
維昌藹藹儷德雙玉玄堂崇者百世南壺朔囊
兩山終始慎脩公鄉

明奉政大夫廣東廉州府同知睿齋林先
生墓誌銘

先生諱康字世熙睿齋別號也系出唐忠臣刺
史蘊公後十四傳至宋宗正寺簿應成公與子
知縣棟公同登咸淳辛未進士子岡孫公諸弟

以順公登戊午辛酉進士故城左舊居坊名聯
桂里曰材行其紀盛云岡孫子師悅公先生高
祖也以蔭授將樂歐寧尉有平寇功調僊遊進
義副尉子圭公明經薦授邑宰訓導陞寧國教
諭六典文衡

敕修永樂大興祀于鄉賢子乾公由歲貢入太
學登永樂乙酉應天府鄉貢授南康教授子添
公質菴先生父也伯父越公登癸酉鄉貢任長
樂司訓卒公扶櫬歸人難之與配鄒孺人隱于

寧海東吳粵球明醫術濟物周貧鄉人稱爲積
德君子及舉先生少穎異甫七歲質菴爲解五
畝之宅章作而言曰今人多無田可耕王道如
何行得暨長多病學不輟窮年看論語二部詣
理日深壬子領鄉薦會試以例拘授荏平訓導
慨然曰敎職吾先世舊物也對青衿揭墳典問
答與他官異型冶蘇湖端範淑顛吾懼弗任耳
乙卯典浙文衡未幾聞外艱奔赴不顧家累哀
毀踰節釋服改博羅司訓著經書講說以敎庠

士傳者甚廣提學林公廷玉按試諸學職稱之
曰說理之文又曰容貌莊雅進退有度佳士也
已已陞於潛知縣於潛岳邑先生先之以孝弟
而廉潔風焉簡易不擾植愛而威興利除害倣
古意而靖戢之杭守今司徒梁公材慎許可獨
先生文章政事優於官藩臬考第槩謂慈祥愷
悌外柔內剛近民平政前巡察今司徒王公堯
封薦堪異選部試居諸節推縣令首隨陞寧國
通判旣佐政巡撫委以能平反要獄摘伏權奸

歷歷可言如脩理縣學重新桓簡公祠委解大
工料價積水脚數千悉檄還諸解戶人皆難公
也甫三載陞廉州府同知視篆值歲凶祈禱雨
晴罔弗應秋熟民恃以安若編里役貧富不眩
清戎籍逃亡可稽移郡學以冀多材正田畝以
公稅賦皆官方而未易數癸未請歸廉之人留
靴以去某官于官時先生自寧國至謂曰同仕
某若某皆能榮其親子獨愧焉某解之曰明神
祐善清世簡修於榮親何有暨轉廉復書至曰

吾廉州長往矣封典遺憾奚釋耶則復獻忠曰
大夫秩崇達道業章昔人合浦還珠其善政矣
於榮親何有慨李世者未三四考鉅貲盈積連
陌廓居以炫于鄉里曰能曰福曰侍養厚藏曰
子孫貽燕溢然譁然鄉里談之嘖嘖然如先生
者志在顯親揚名或稽其會跋踏百年其賢逾
諸俗信哉家食弗兼味居祇數廬足不入城市
郡邑屢招大賓祇一赴吐納養生山陬水澣時
引耆舊而徜徉焉湛甘泉相遇京邸立談見意

氣因定交有翫麟存家風材美出郟林羅浮見
眉宇壺山秀胸襟之贈家素翁記睿齋謂行古
之道其官也如家其居也如寄其守而不易也
如長雲倦鳥水到渠成隨所息而息焉皆實錄
也某族小子爾蓋有以竊知先生矣先生生成
化癸未七月二十八日終於嘉靖庚子七月七
日年七十有八配陳孺人城東處士陳謹公女
事舅姑處妯娌以孝恭聞其御諸妾撫諸婦寬
而能愛內子有相孺人多焉生成化癸未五月

二十日卒嘉靖壬午十一月三日子三長簡郡
庠生娶知府方英女次克復嗣伯兄後娶余勗
女三克忠側周出娶縣丞丘悌女女一適瑛長
子孫男四先是手營玄堂於白沙白雲峰龍藏
嶺郭乾山亥向凡四窀乙酉葬孺人於右中虛
左中爲公壽藏左之左爲長子壽藏右之右爲
冢婦壽藏祔茲歲己酉正月八日簡等奉先生
柩歸焉行蹟之詳門人余方伯夔狀之備銘曰
維林始先生濟美鸞之停鵠之時綿陔剔休咸

茲視維德祁先生隆施青衿礪兮岳民碑用而
不盡留若遺維龍藏先生允當韞頌璧兮崇吉
岡弔古尋真遠有光維不泯先生其人非今自
今含太真自我非我委厥旻以降以陟阿若神

愧瘖集二十一卷終



